

Nuna tamakkerlugu utoqqaat illuisa nutaanngilisimaqisut ullutsinnut naleqqussarlugit aaqqissuunneqarnissaannik pilersaarusiornissaq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Ruth Heilmann, Siumut)

Akissuteqaat

(Ilaqtariinermut, Kultureqarnermut, Ilageeqarnermut Naligiissitaanermullu Naalakkersuisoq)

Inatsisartunut ilaasortap Ruth Heilmannip nuna tamakkerlugu utoqqaat illuisa nutaanngilisimaqisut ullutsinnut naleqqussarlugit aaqqissuunneqarnissaannik pilersaarusiornissaq pillugu apeqquteqaat aallaavigalugu oqallinnissamik siunnersuuteqarneranut qujavunga.

Inuaqatigiinni utoqqarnut tunngasut agguataarsimanerisa allanngoriartornerisa kinguneraa allanngoriartornerup inuaqatigiinni suliassaqarfimmut pineqartumut pissarititaasut, utoqqaat namminneq immikkut nukissaat, kulturikkut kingornussavut, kiisalu pineqartut utoqqalinermanni pissarsiaqarnartumik nalilimmillu atugaqarnissamik piumasaat kissaataallu eqqarsaatigalugit pinissaanut qanoq tapersiisinnaanerluta sutigut tamatigut isummertariaqarnerput Naalakkersuisut pingartippaat.

Utoqqarnut tunngasut, taakkununnga ilanngullugit isumassuineq, paaqqinninneq inissiallu kommunimit akisussaaffigineqarnerat kommunillu ataatsimoortumik tapiissutit aqqutigalugit aningaasartuutinut taarsiissuteqarfingeqartarnerat Naalakkersuisunit eqqaasitsissutigineqassaaq. Utoqqaat illui il.il. pillugit Inatsisartut peqqussutaat nr. 11, 30. oktober 1998-imeersoq naapertorlugu kommunalbestyrelsip akisussaaffigaa kommunini utoqqarnik paaqqinniffinni inissat pisariaqartinneqartut pigineqarnissaat. Taamatuttaaq utoqqalinermi pensionisiallit pisariaqartinneqartut sammisassaqartinneqarnissaasa qularnaarneqarnissa kommunalbestyrelsit qularnaagassaraat.

Taamatut nammagassanik agguataarineq sammisaq pillugu oqallinnitsinni suliarinninnitsinnilu ersersinneqartariaqarpoq.

Sammisaq nunatsinni utoqqartatta siunissami najugaqariaasissaattut ittoq taama pingaaruteqartigisoq pillugu Naalakkersuisut kommunik, KANUKOKA-mik soqtigisaqaqatigiinnillu oqaloqateqalernissamut oqaloqatigiinnermilu peqataanissamut Naalakkersuisut soqtiginnituaannarpot.

Isumaginninnermut tunngasuni annertusaaneq pillugu kaajallaasitaq nr. 213 naapertorlugu utoqqarnik paaqqinniffeqarnermut tunngasuni inissaqassuseq annertusarniarlugu Naalakkersuisut ingerlatanik annertusaanermut 50 %-inik tapiissuteqarsinnaapput. Utoqqarnut inissialiortoqartillugu kaajallaasitaq naapertorlugu Namminersorlutik Oqartussat tapiissuteqarnissamut pisussaaffeqanngillat.

Sisimiuni utoqqaat illuata allilerneqarnissaanut, Qaanaami utoqqaat illuliornissamut, Aasianni utoqqaat illuat allilerneqarnissaanut, Ilulissani puigortunngortut najugaqarfissaannut, kiisalu

Qaqortumi utoqqaat illuannut tapiissuteqartoqarnissaa Naalakkersuisut ukioq manna Inatsisartut Aningasaqarnermut Ataatsimiititaliaannut inassutigaat.

Taamaalilluni sanaartugassat 2011-mi tulleriaarneqartut kommunini sisamani taakkunani agguataarneqarput piffissamilu 2011 – 2014-imi naammassineqassangatinneqarlutik.

Ataatsimut isigalugu aningaasanut inatsimmi utoqqarnut tunngasuni sanaartornermut toqqortat atugassangortinnejareerput tamatumanilu siunertaavoq innuttaasunut utoqqarnut namminerisaminnik ineqannngitsunut ineqarnikkut pissutsit pitsanngorsarneqarnissaat.

Inuaqatigiit agguataarneqarnerisa allanngoriartornerisa ukiuni tulliuttuni utoqqalinermi pensionisiallit amerlieriarujussuarnissaannik nassataqarnissaat ilisimaneqarpoq. Taamatut allanngoriartortoqarnera inuaqatigiinnut atugarissaarfiusunut allanut tamanut assersuunneqarsinnaavoq.

Naalakkersuisut isumaqarput nunatsinni innuttaasut namminneq attartukkaminni pigisaminniluunniit sapinngisamik sivisunerpaamik najugaqartassasut. Akerlianik nunatsinni maani utoqqaat aamma namminneq ineqarsinnaajunnaaraangata utoqqarnut inissianik naleqquttunik neqeroorfigineqarsinnaasassapput.

Ineqariaatsit ullumikkut utoqqarnut neqeroorutigineqartartut tamarmik tassaapput utoqqaqatigiinnut assigiinngitsorpassuarnut tunngatinneqartut. Utoqqaqatigiilli piumasaqaataat kisitsisit atorlugit nassuaatinut tunngagunannigillat naatsorsuutigisariaqarpapullu utoqqaqatigiit piffissap ingerlanerani pensionisiaqalernerminni najugaqarnissaminnut kissaateqalerlutilu piumasaqaateqalerumaartut.

Utoqqarnut inissiat assigiinngitsut eqkartussallugit pingaaruteqarpoq, aammali utoqqaat siunissami sumi najugaqarusunnerat eqkartortariaqarpoq.

Paaqqinniffit, utoqqaat illui utoqqarnullu inissiat, kiisalu utoqqaat najugaqatigiiffii siunissami utoqqarnut ineqarfissatut naleqqutiinnassapput, assersuutigaluguli aamma isumaliutigineqarsinnaavoq illoqarfinni annerusuni paaqqinniffit annerusut pisariaqartinneqaleriartuinnassasut eqaannerusumik najugaqariaatsit ilanngullugit. Imaassinnaavoq utoqqarnut inissiat ataasiakkaajusut pisariitsunik isaariallit utoqqaallu sullineqarnissamik neqeroorutit ujartugaat samminerusariaqarivut.

Imaassinnaavoq ungasinnerusoq eqqarsaatigalugu utoqqaqatigiit ikinnerusut ataatsimoorlutik namminneq kissaateqarsinnaassasut namminneerlutilu arlalinnik inissialiortiterlutik atortorissaarutitalinnik – tassa Danmarkimisut ”ældrekollektiver”-tut (utoqqaat najugaqatigiiffiisut) ittunik.

Naalakkersuisut isumaqarput periarfissarpasuaqartoq, naak aningaasaqarneq isumassarsianut malinnaatinneqartariaqaraluartoq. Maani oqallinneq soqtiginnittusut tamaasa suleqatigalugit nuna tamakkerlugu utoqqarnut periusissaliornissatsinnut, tassunga ilanngullugu utoqqarnut tunngasuni inissianik amerlsaanissamut ataatsimut pilersaarusiornissatsinnut aallarniutaasinnaavoq. Taamatut pilersaarusiorneq Namminersorlutik Oqartussat kommunillu akornanni suleqatigiinnerisigut ingerlatallillu utoqqarnut tunngasuni ilisimasallit soqtigisallillu akuliutsinnerisigut pisariaqarpoq.

Tamatumunnga atatillugu ilisimatitsissutigineqassaaq Naalakkersuisut 2012-imi utoqqarnut periusissamik saqummuinialersaarmata tamannalu “Akileraartarneq Atugarissaarnerlu pillugit Isumalioqatigiissitap isumaliutissiissutaanik malitseqartitsineq pillugu Nassuaammut” UKA 2011-mi kingusinnerulaartukkut eqqartorneqartussamut naapertuuppoq.

Innuttaasunut utoqqarnut sullissinerup sapinngisamik qaffasissuutinneqarnissaq anguniagaassaaq. Taamatuttaaq kikkulluunniit sapinngisamik sivisuumik nammineersinnaanissaat qularnaarniarlugu suliniuteqartoqassaaq. Aningaasartuutit killilersimaarnissaat kisiat pinnagu aammali pineqartut inuunerminni pitsaanerpaamik atugassaqartinnejarnissaat pillugu.

Taamaattumik Naalakkersuisut isumaqarput utoqqaat ineqariaassisaaannik oqallinneq, kommunit Namminersorlutillu Oqartussat akornanni nammagassanik agguataarineq ataqqillugu iluaqutaalluassasoq. Naalakkersuisut taamatut oqaaseqarlutik pissanganartumik kingunilimmillu oqallinnissamut qilanaarput.